



LE GOUVERNEMENT
DU GRAND-DUCHÉ DE LUXEMBOURG
Ministère d'État

Gemeinsam Äntwert vum Här Premierminister, Staatsminister a vun der Madamm Justizministesch op d'parlamentaresch Fro n°6644 vum 10. August 2022 vum honorabelen Deputéierte Marc GOERGEN

Zu de Froen 1 a 4-7:

D'Regierung verweist op d'Äntwerten op d'parlamentaresch Froen 4685 a 4692 vum 20. Juli 2021.

Den Artikel 3 vum ofgeännerte Geheimdénsgesetz vum 5. Juli 2016, deen d'Missioun vum Geheimdénsgesetz (SRE) virgesäit, schléisst ausdrécklech "toute surveillance politique interne" duerch den SRE aus.

D'Moyene vum SRE gin agesaat am Fall vun enger potentieller Bedrohung duerch Spionage, gewaltbereeten Extremismus, Terrorismus, Verbreedung vu Massevernichtungswaffen oder verteidegungsrelevante Gidder zesumme mat den entspriechende Technologien an organiseiert Kriminaliteit oder Cyber-Bedreeung souwäit des mat deene virgenannt Aktiviteiten zesammenhänken.

D'Regierung ännersträcht op en Neits d'Existenz vun de gesetzlech verankerte Kontrollmechanismen vum SRE um Niveau vun der Administratioun, der Regierung, dem Parlament an den zoustännege Gerichtsinstanzen, déi dofir do sinn, all Bierger déi néideg Rechtssécherheet ze garantéieren.

Wéi schon oft notéiert, kënnen aus sécherheetsrelevanten an ermëttlungstechnesche Grënn keng Détailler iwwert operationnell Froe publizéiert ginn.

Betreffend den SRE befanne sech d'Moyenen, déi däerfen agesat ginn an d'Prozeduren, déi müssen agehale ginn an den Artikelen 5-8 vum SRE-Gesetz.

Et siew präziséiert datt den Asaz vun den Moyene vum SRE am Respekt vun dräi wesentleche Prinzippien erfollegt: der Legitimitéit, der Proportionalitéit an der Subsidiariteit. Dëst geschitt am Sënn vun enger grousser Professionalitéit a Saache Präventioun vu Menacen, gekoppelt un en héije Schutzniveau vum Eenzelen a senger Privatsphär.

Desweiederen applizéiert sech d'Gesetz vum 1. August 2018 iwwert de Schutz vun natierleche Persounen a Bezuch op den Traitement vu perséinlechen Daten am Strofrecht an hisichtlech der nationaler Sécherheet och fir den SRE.

Zur Fro 2:

Den Artikel 88-1 vum Code de procédure pénale gesäit de legale Kader fir deen der Justiz et erlaabt fir eng Ecoute-Mesure anzusetzen, daat heecht d'Oflauschteren vun Telekommunikatiounsgespräicher.

Déi strikt Conditionen ënnert deenen dës Mesure kann agesat ginn, sinn am Artikel 88-2, Paragraphe 2, vum Code de procédure pénale fest geluecht.

Eng vun deene Conditionen seet, dass den Untersuchungsriichter eng Ecoute-Mesure nëmme kann asetzen géint eng Persoun fir déi « des faits déterminés rendent la personne à surveiller suspecte, soit d'avoir commis l'infraction ou d'y avoir participé, soit de recevoir ou de transmettre des informations destinées à l'inculpé ou au suspect ou qui proviennent de lui ».

De Paragraphe 6 vum Artikel 88-2 vum Code de procédure pénale präziséiert och dass d'Ecoute net dierf eng Persoun viséieren, déi dem Secret professionnel op Basis vum Artikel 458 vum Code pénal ënnerläit.

D'Artikelen 48-12 bis 48-16 vum Code de procédure pénale betreffen d'Iwwerwaachungen vu Persounen. Och fir déi Mesure gesäit den Artikel 48-13 vum Code de procédure pénale spezifesch Conditione vir. Eng vun dëse Conditionen ass, wéi och bei der Ecoute-Mesure, « qu'il existe des indices graves que les infractions sont de nature à emporter une peine criminelle ou une peine correctionnelle dont le maximum est égal ou supérieur à un an d'emprisonnement ».

Den Untersuchungsriichter kann also keng Ecoute-Mesure oder Iwwerwaachung ordonnéieren géint eng Persoun op Grond vun hiren politeschen Aktivitéiten. Den Untersuchungsriichter kann, op Basis vum Code de procédure pénale, dës Mesure just géint eng spezifesch, ënner Verdacht gesate Persoun ordonnéieren an dat onofhängeg vun hirer Funktioun, ausser si fällt ënnert de Secret professionnel op Basis vum Artikel 458 vum Code pénal.

Aus sécherheetsrelevanten an ermëttlungstechnesche Grënn kenne keng Détailler iwwert d'Asetzen vun de Mesure publizéiert ginn.

Fir weider Detailler zu dëser Fro verweist d'Regierung op d'Äntwert op d' parlamentaresch Fro n°4685 vum 20. Juli 2021.

Zur Fro 3:

D'Prozedur vun den Perquisitiounen an de Beschlagnahmen vun Objeten, wéi zum Beispill Computeren, gëtt och am Code de procédure pénale beschriwwen an ënnerläit strenge Conditionen.

D'Vorratsdatenspeicherung ass am modifizierten Gesetz vum 30. Mee 2005 virgesinn an den Artikel 67-1 vum Code de procédure pénale erlabt dem Untersuchungsrichter gespeichert Daten vun enger bestimmter Persoun ënnert strikten Conditionen nozefroen. Wéi och bei deenen uewegenannte Mesuren, kann den Untersuchungsrichter nëmmen den Zougrëff zu den Daten vun enger spezifesch ënner Verdacht gesatener Persoun ordonnéieren. De Verdacht muss op eng kriminell oder correctionnel Strof hiweisen där hiert héchsten Strofmoss gläich oder méi wéi een Joer Prisong ass.

Aus sécherheitsrelevanten an ermëttlungstechnesche Grënn, kenne keng Détailler iwwert d'Asetze vun den Mesuren publizéiert ginn.

Fir weider Detailler zu dëser Fro verweist d'Regierung op d'Äntwert op d'parlamentaresch Fro n°4685 vum 20. Juli 2021.

Lëtzebuerg, den 8. September 2022

De Premierminister, Staatsminister

(s.) Xavier BETTEL